

Bakea justiziarekin eskatu dute Los Angeleseko beltz eta hispanoek

Rodney King jipoitu zuten polizien epaia emateko ez dute adostasunik lortu oraindik

Los Angeleseko mugimendu zibil beltz eta hispanoetako buruzagiek bakea eta lasaitasuna eskatu dute Rodney King herritar beltza jipoitu zuten lau polizien epaia jakiten denerako, baina gehienek epaia bidezkoa eta kondenatzailea izan dadila exigitu dute, epaimahaiak poliziak kondenatu ala absolbitzeko eztabaidetan segitzen duen bitartean.

LOS ANGELES

Hirigunean dagoen Justizia Departamenduaren egoitzaren aurrean, Shannon Reeves Kolorado Jendearen Garapenerako Elkartea Nazionala (NAACP) erregio buruzagiek «erruduntasun epaiak egotea» desiratu zuten, «hori litzatekeelako bidezkoa». Eta poliziak erruduntzat jotzen badituzte «espero dezagun ez digutela eskuetatik aldegingo sei hilabeteko epaiekin». NAACP Estatu Batuetako mugimendu zibil handiena da, eta bakearen aldeko talde baten osaketan parte hartu zuen, Ortizadar Koalizioa izena daramana eta beste mugimendu zibil beltz eta hispanoekin osatuakoa.

Robert Lobato 'Care Center' erakundeko buruzagiek joan zen urteko istiluak ez direla berriro gertatuko uste du, baina segurtasun indarrei herritarren eskubide zibilak ez bortxatzeko eskatu die balizko leherketa sozialik izanez gero.

Carlos Vaquerano errefuxiatu



Shannon Reeves NAACPko buruzagia Justiziaren egoitzaren aurrean prentsaurrekoa ematen.

EPA

ertamerikarren Carecen erakundeko buruzagiaren arabera, berriz, Los Angeleseko komunitate hispanoa beldur da, istiluak izanez gero, inmigrazio zerbitzuetako agenteek ere parte har lezaketelako joan zen urtean bezala. Izan ere, 1992ko apirilaren amaierako istiluetan atxilotutako 15.000 pertsonetatik erdiak baino gehiago hispanoak ziren, eta horien artean 1.200 legez kanpoko inmigranteak ziren. Inmigratiozko zerbitzuek EEBBetatik kanporatzeko aprobetxatu zuten.

«ZURRUMURRUEI KASURIK EZ» Epaiaren zain, Los Angelesen dagoen tentsioa dela eta, Pete

Wilson Kaliforniako gobernadoreak 600 goardia nazional atzodanik prest egoteko agindua eman zien. Tom Bradley Los Angeleseko alkateak, berriz, polizien epaia eman dela dioten zurrumurruei kasurik ez egiteko aholkatu zien herritarrei. «Epaiak bakarrik esango digu noiz lortu den epaia, eta orduan jakin-godu», esan zuen.

Kalean, ordea, epaia dagoeneko emanda dagoela diote, eta poliziak kargurik gabe irtengo direla kalera edo zigor laburrak jasoko dituztela diote zurrumurruek. Horren adibide argia, segurtasun indarren presentzia dela argudiatu dute, Los Angeleseko agintariak badaezpadako neu-

riak direla dioten bitartean.

Epaimahaiko 12 kideek —bederatzi anglosaxoi, hispano bat eta beltz bat— atzo berrekin zioten laugarren aldiz, epaiaren inguruan adostasuna lortzeko eztabaidari, aurreko hiru bileretan ados jartzeko biderik ez zegoela eta. Aurreko epaimahaia anglosaxoiek osatzen zuten eta oraingoan beltzek eta hispanoek parte hartzen dutelarik, epaimahaia egokiagoa dela uste dute mugimendu zibilek. Horrela onartu zuen Reevesek, zeinaren arabera «epaia alde batekoa edo bestekoa izan, jendeak onartu beharra dauka hau bere epaimahaia dela eta hiriak batuta egoten segitu beharra daukala garapenerako».

Hildako buruzagi komunistaren aldeko ospakizunei ekin diete Hego Afrikan

JOHANNESBURG

Bake eta lasaitasunari eusteko deia eginez, Afrikako Kongresu Nazionalak (ANC) atzo ekin zien Chris Hani pasa den larunbatean hil zuten buruzagi komunistaren aldeko ekintza ofizialei. Hileta elizkizunekin amaituko dira ospakizun hauek, eta bertara milioika lagun joango direla iragarri dute dagoeneko antolatzaileek.

«Arrazakeriaren aurka ari gara borrokan baina ez dugu sekula arraza borroka bat hasiko», adierazi zuen atzo Harry Gwala ANCko buruzagiek larunbatetik hona izandako hilketa eta bortizkeri ekintzak gaitzetsi asmotan. Izan ere, Haniren heriotzak Hego Afrikako milaka herritarren haserrea piztu zuen eta haren ostean lapurketa, sute eta azal zuriko pertsonen hilketa izan ziren herrialde osoan.

Januz Jakob Wallus buruzagi komunistaren usteko hiltzailea den herritar poloniarra, bestalde, atzo deklaratu zuen Johannesburgen epailearen aurrean. Auzitegian egin zuen agerraldia motza izan zen oso, bi minutu eskas iraun zuen eta poloniarra maiatzaren 12rte atxilotzea erabaki zuten epaileek.

Atxilotua auzitegian deklaratzeko ari zen bitartean kanpoaldean ez zen inolako enfrentamendurik gertatu, azken egunotako gatazkak areagotuko ziratekeela eta bertan polizia ugari —300 bat inguru— bildu zen arren.

Walus Afrikaner Erresistentzia Mugimenduko taldekidea da, bertako buruzagi den Eugene Terrablanchek baieztatu zuenez. Talde hau eskuin muturreko joerakoa da eta printzipio faxisten defenditzailea.

Bake negoziaketak bultzatzeko bilduko dira gaur Mubarak eta Rabin

JERUSALEM

Ekialde Erdiako bake negoziaketak bultzatu nahian, gaur bilduko dira Hosni Mubarak Egiptoko lehendakaria eta Yitzhak Rabin Israeleko lehen ministroa. Honek eman dezakeenak baldintzatuko du hein handi batean hilaren 20rako aurrikusita dagoen bake elkarrizketen itzuli berria.

Palestinarrak baikor agertu dira bilera honen aurretik, eta bertan eurak negoziaketa mahaira itzultzeko beharrezkoak diren baldintzak onartuko dituztelakoan daude.

Palestinaren Askapenerako Erakundeko (PAE) buruzagia den Jasser Arafat eta Faisal Al Hussein Lurralde Okupatuetaordezkari gorena atzo bildu ziren Kairon Mubarakekin. Rabinekin gaur egitekoa duen bilkuraren aurretik, Israeleko lehen ministroari deportatutako itzulera exigitzeko eskatu zioten antza ordezkari arabiarrek Mubarak.

Negoziaketei ekin diete berriz ere UNITA eta Gobernuak

ABIJAN

Atzo ekin zioten Abijanen Angolaren Independentzia Osorako Batasun Nazionalak (UNITA) eta bertako Gobernuak negoziaketen bigarren itzuli ofizialari. Angolan indarrean dirauten enfrentamenduak eten eta inguratuta dauden milaka herritar laguntzeko konpromezua lortzea izango dute helburu Nazio Batuen bitartekartzat egingo diren negoziaketa hauek.

Abijaneko bilera hasi aurretik Butros Gali Nazio Batuetako idazkari nagusiak gogor ohartarazi zituen bertan parte hartuko duten bi aldeak, eta NBeko indarrak Angolatik atera egingo direla jakinarazi zuen baldin eta bake negoziaketetan aurrerapausorik ematen ez bada.

Luandako Gobernuaren ordezkari gisa Fernando Muteka eta Higinio Carneiro jeneralak joan dira Abijanera eta UNITA gerlari taldeak, berriz, erakundeko informazio arduraduna den Jorge Valentin bidali du bertara.



Manifestaldiak Hego Afrika osoan izan ziren.

AP